






coll. got














1613.

8^e Carl 1512

H 2187

L 27237

28621

LE BON
FRANÇOIS.

Ou,
DISCOVRS D'ESTAT,
contre les libelles.

M. DC. XV.

Case

F

39

1326

1615 60

THE NEWBERRY
LIBRARY



LE BON FRANÇOIS, contre les libelles.

IVsques à quād, maudits & malheureux escriuains,
Irez vous décrians au Roy & aux Estrangers la fide-
lité des bons François? Vostre rage n'est-elle point
encor' assouuie, apres auoir deschiré en mille sortes
la reputation des ministres, pour recompense de leurs
veilles au bien de l'Estat, & de leur trauail qui assure
vostre repos? Et faut-il que foulant aux pieds toutes
loix diuines & humaines, vostre furie offence desor-
mais l'innocence du Roy, & la sagesse de la Réyne,
en violant le sacré-sainct respect qui leur est deu, vray
lien de la tranquillité publique? Est-ce donc le
moyen de reformer le Royaume, que de le ietter en
vne si horrible confusion? Conserue-on vn edifice
en mettant le feu aux quatre coings & au milieu?
Mais quelle phrenesie d'apporter ainsi des remedes,
pires que le mal; de vouloir empescher vn malheur
par vn plus grand; & de perdre la France de peur
qu'elle ne se perde? Vostre insolence nourrie par
l'impunité en est maintenant venuë iusques là, que
ceste grāde Reyne, à la prudence, au courage & bon-
heur de laquelle nous deuons apres Dieu la conser-
uation de ceste Monarchie, ne scauroit prendre avec
tout le conseil du Roy son fils, aucune resolution si
vtile que vous n'accusiez d'estre dommageable; si
saincte que vous ne calomniez d'impieté! Et tout

cela, pource que la paix & la Iustice regneront par
 ses conseils; & que vous ne pensez pas trouuer la seu-
 reté de vos crimes priuez, que dedans le desordre pu-
 blic: mais si le desespoir ne possedoit entierement, &
 les furies n'agitoient vos ames noires d'impieté, ne
 deuriez-vous point plustost attendre de la bonté
 de leurs Majestés le pardon de vos fautes, que de la
 rigueur de leur iustice la punition de vos forfaitcs ?
 cela estant de la felicité du regne, & particulieremēt
 du bon-heur de la conduite de ceste Princeesse donnee
 du Ciel, que chacun participe aussi bien aux effectcs
 de leur clemence, qu'à ceux de leur liberalité; ainsi
 que le Ciel est commun à tous, que le Soleil esclaire
 tout le mōde, & qu'un mesme air sert à la respiration
 de tous les hommes: Leurs Majestés qui ont mieux
 aimé esprendre avec prodigalité leurs finances, mais
 parmy les François, afin de ne resprendre le sang de pas
 un François, & de racheter par argent l'innocence
 de ceux que possible le desir de l'argent eust rendus
 coupables, seroient-elles iamais creües n'estre pas
 autant enclines à pardonner qu'à donner ? C'est donc
 la malice qui vous bande les yeux, esprits vlcerez, si
 vous n'esperez vostre part en la grace publique, & si
 vous ne vous promettez non seulement le pardon de
 leur clemence, mais aussi les faueurs & les bien-faicts
 de leur largesse, si en retournant au grād chemin seur
 & aisé de l'obeissance legitime vous vous repentēz à
 bon escient de vostre aueuglement volontaire, &
 de la malignité de vos iniustes procedures, le repentir
 n'estant iamais tardif quand il est veritable, pour re-
 cognoistre avec tous les bons la sincerité de leurs in-
 tentions au bien de ceste Couronne, l'equité de leurs
 conseils, & la iustice de leurs deportements, qui sont

5

tous à l'honneur de Dieu, à l'aduancement de la Religion, à la gloire du Royaume, & à la paix generale de la Chrestienté : Qu'est-ce donc, consciences cauterisees, qui empesche vostre resipiscéce, & qui vous faict vomir tant de plaintes, ou plustost tant de calōnies contre la conduicte presente des affaires? Le mariage du Roy vous donne de l'ombrage, ce disent vos plumes enueneimees : Et quoy voudriez-vous qu'il ne se mariast point, le plus grand mal que les ennemis de l'Estat nous pourroient souhaitter : ou bien ceste grande & illustre alliance des deux plus puillātes Couronnes du monde, inspirée du Ciel pour le bien de la terre, vous peut-elle offencer ? ô que si vous vouliez vne fois leuer le masque pour recognoistre & aduoüer la verité, on ne recognoistroit que trop que ce n'est nullement aux alliances que vous en voulez, que ce n'est point cest heureux Hymence qui vous blesse, ains seulement la paix & tranquillité qui en resultent; &, si ie l'ose dire, la manutention de la foy que vous n'avez pas : car autremēt vous ne feriez pas semblant de procurer l'vtilité de l'Estat par le domage de la Religion : Et comme es derniers troubles on alleguoit le pretexte du spirituel pour ruiner le temporel : maintenant vous ne prendriez pas celui du temporel pour ruiner ensemble & bouleuerfer tous les deux. Demades partizan d'Alexandre disoit vn iour aux Atheniens, qui s'opposans à la vanité de ieune Prince, & l'empeschans d'estre receu au nôbre des Dieux, se mettoient en peril d'estre accablez par sa puissance : Gardez qu'en voulant deffendre le Ciel vous ne perdiez la terre. Ceste parole se pourroit retourner contre vous, mais par vn bien plus grand reproche : que vous prissiez garde qu'en nous voulant

iustement persuader que vous deffendez la terre, si
 peu de chose au prix du Ciel, de ne nous faire risquer
 en mesme temps l'un & l'autre: cōme iadis firent les
 Iuifs insensez, qui postposans pour la crainte des Ro-
 mains, ce qui estoit de leur conscience, à l'interest
 terrestre, perdirent, par vn iuste iugement de Dieu,
 l'Estat pour l'amour duquel ils auoient hazardé la Re-
 ligiō. Les aduātages, à la verité, que l'Eglise reçoit de
 ces tres-heureuses alliāces sont si manifestes & si eui-
 dēs, à ceux mesmes qui ne voyēt point, que vous ne
 les oseriez improuuer que sous la vaine apparence,
 & la faulse couleur de quelque consideration politi-
 que: Et c'est pourquoy vous faictes calomnieusemēt
 retentir par tout les sinistres augures & presages des
 maux imaginaires qui pourroient arriuer, ou dēs à pre-
 sent d'un conseil d'Espagne, amené par nostre ieune
 Reyne, les delices de la terre, ou bien quelque iour
 d'une Regence Espagnolle: comme si deux ou trois
 Espagnols estoient capables d'arracher à Messieurs
 les Secretaires d'Estat la plume, ou à Monsieur le
 Chancelier les sceaulx; ou comme si la Reyne elle
 mesme pour le bien commun de la France n'auoit pas
 interest à la conseruation de son autorité, dont de-
 pend nostre bon-heur. Et quant à l'autre poinct, al-
 lez oyseaux malheureux, & prophetes des tombeaux,
 allez aux extremitez du monde, & seulement parmy
 les ennemis du nom Chrestien, ou plustost les demōs
 infernaux predire & annoncer les miseres & les mal-
 heurs qui pourroient suyure celuy dont la simple pē-
 see est criminelle, bien plus la prediotion ou le desir:
 Ains plustost malgré vous nostre Roy comblé d'an-
 nees, de gloire & de fœlicité, n'ira point regner
 dans les Cieux, que premierement il n'ait affermy en

terre le throsne & la lignee de ses successeurs, entre les
 mains desquels il fera doucement couler son sceptre
 avec toutes les benedictions & les graces que nous
 promettent sa pieté, & toutes les autres rares vertus.
 Mais quand l'ire de Dieu, & nos pechez causeroient
 ceste espouventable infortune: Vous Messieurs les
 zelés au bien public & au service du Roy, & qui aués
 desia tant declainé contre ceste derniere Regence tât
 salutaire, & qui ne sera iamais assez loüee, souffririez
 vous encor ceste autre, s'il ne le sembloit ainsi bon à
 vostre fantasie, qui prend plaisir à controoler toutes
 choses, & particulierement les plus saintes? Et ia-
 coit que les exemples du passé vous deussent faire
 bien esperer de l'aduenir, & entr'autres celuy d'une
 Blanche de Castille, mere de celuy dont le Roy est
 heritier, nō seulement du Royaume & du nom, mais
 aussi du sang & de la pieté, vous n'en feriez pourtant
 lors que ce qu'il en plairoit à vostre malice, estant
 bien plus mal-aysé d'empescher l'establissement des
 choses, que de les renuerfer lors qu'elles sont vne fois
 establies: Que si vostre foiblesse & impuissāce n'estoit
 pour l'empescher, & que tous les maux que la haine
 que vous portez à cest Estat vous faict souhaitter &
 prognostiquer, en fussēt autāt veritables, qu'ils ne sōt
 rien qu'imaginaires, ou plustost apertement faux: ils
 ne seroient nonobstant tout au plus qu'esloignez &
 incertains; & cependant vous nous les voudriez bien
 faire fuir par des miseres & presentes & certaines, en
 ouurant la porte aux calamitez, & nous precipitant
 aux desolations des guerres ciuiles, fleau le plus fune-
 ste de la vengeance diuine, par le moyen d'une guerre
 estrangere, & en attirant en France des armées Espa-
 gnoles pour n'y auoir voulu souffrir vne infante d'Es-

pagne avec son train. Car tout ainſi que tandis qu'un corps eſt en ſanté on n'apperceoit point ſes defauts intérieurs, mais la moindre maladie ramentoit & decouure tout ce qu'il y peut auoir de pourry, rompu, ou diſloqué au dedans; de meſme pēdant qu'un Eſtat eſt en paix au dehors, on ne voit pas à la verité ſes imperfections inteſtines, mais incontinent la plus petite guerre eſtrāgere remuē & met au iour tous ſes maux cachez. Qu'arriueroit-il donc de la guerre contre vn Roy d'Eſpagne irrité du refus de ſon alliance, apres qu'elle a eſté ſignée par le Roy, la Reyne, les Princes du ſang, autres Princes Officiers de la Couronne, & principaux Conſeillers & Miniſtres de l'Eſtat, & demandee par les trois Ordres du Royaume conuozuez en Eſtats généraux ſous l'authōrité de leur Prince legitime? Qui nous pourroit iamais aſſeurer d'une concorde vniuerſelle, parmy tant de diuers deſſeins & intereſts differends des particuliers? Et qui voudroit cautionner Meſſieurs de la Religion pretendūe reformee de ne ſe preualoir lors de la miſere de l'Eſtat, & de la neceſſité des affaires, comme ils firent du regne meſme de Henry le Grand, pendant qu'au ſiege d'Amiens il iōiſoit de ſon reſte contre l'Eſpagnol, enhardis principalement de l'euenement & du ſucces favorable de ceſte entrepriſe, & poſſedans encores à preſent leurs places de ſeureté, les penſions de leur Nobleſſe, l'entretienement de leurs garniſons, & les appoinctemens de leurs Miniſtres, aduantages & eſmolumens de s'eſtre ſeruis de l'occaſion, & d'auoir trauersé les affaires de leur Maĩſtre, au tēps que moins ils le deuoient: Ce que ie dis non pour les accuſer d'en vouloir à la Royauté, choſe qui ne peut entrer au cœur d'aucun François, moins au leur, qui y a eſté

si particulièrement attaché en ces derniers troubles:
 mais pour prouuer que ce vaisseau, ou ceux qui sont
 dedans, ont des desirs & des pretentions si contraires,
 & dont les nautonniers se regardent desia de trauers,
 on ne doit pas souhaitter que par le dehors il soit en-
 cores assailly de la tēpeste: moins encores veux-je di-
 re, qu'ores que l'on approuue d'ordinaire en la police
 temporelle, la forme de gouuernement, que l'on esti-
 me la meilleure en l'Estat Ecclesiastique, qu'ils sou-
 haissent pour cela en ce Royaume le gouuernement
 populaire qu'ils ont desia estably en leur Religion,
 pas vn d'eux ne le pouuant souffrir chez soy: quoy
 que nous peussent faire soupçonner ces cercles, & les
 exemples de ce qui s'est passé en Allemagne, en Suyse,
 en Holande, & à Geneue; & de fraische memoire
 le temperament democratique de leur Turquet: &
 quelque diminution que nous deust faire apprehēder
 à ceste venerable Monarchie, la caducité des choses
 humaines; la vieillesse de l'Empire; le malheur du sie-
 cle; la malice des hommes, & les diuisions de l'Estat:
 Ains au contraire, nous deuons croire qu'ils se con-
 tenteront de la liberté de leurs cōsciences, & de l'ob-
 seruatiō inuiolable, que le Roy leur a tant de fois
 promise & iuree, de leurs Edicts & priuileges: Non
 plus, que ie ne veux point aussi douter de la fidelité
 des gēs de guerre: mais puis qu'ē matiere d'Estat, on a
 peu ou point du tout d'esgard à la volōté, ains seule-
 ment au pouuoir, & que l'on doit prendre garde non
 à celuy qui nuit, mais bien qui peut faire du mal: Ce
 sera tousiours tres-sagement faict de fuir de tout no-
 stre possible l'entree d'une guerre, qui peut rendre les
 simples Capitaines des places autant de petits Roys
 ou plustost de Tyrans; & les moindres soldats autant

de Colonels, selon le party où ils se ietteront : L'autorité du Roy, & celle de la Iustice ne reluit que dedans la paix & le calme: dans la tempeste & le trouble sa Majesté Royale s'obscurcit. Et tout ainsi que certaines mauuaises plantes n'ont autre soing que d'estendre leurs racines aux despés de toutes les autres, & de s'engraisser de leur famine: De mesme en ce temps là chacun ne recerche que son aduantage particulier, & sa richesse dedans la perte & la pauureté publique. Je ne veux aussi mal augurer ny représenter les perils ausquels s'exposeroient tous les iours les personnes sacrees, qui portent toutes nos vies dans la leur: ains ie me contenteray de dire, que la moindre paix sans deshonneur, doit tousiours estre preferee à la guerre la plus aduantageuse; & qu'il est bien plus mal-aysé de poser les armes, que nō pas de les prendre; & qu'il nous seroit facile de nous ietter en vn precipice d'Anarchie, & de confusion vniuerselle; mais presque impossible de nous en retirer: la cheute seule estât en nostre puissance, si nous nous laissons, pour nostre malheur, persuader à vos langues ennemies de nostre repos: mais la deliurance n'en pouuāt estre esperée que de la main puisante & miraculeuse de Dieu. Or d'attirer volontairement & de gayeté de cœur sur nos testes des maux, desquels pour nous retirer, il faut que Dieu face des miracles: ce n'est resolutiō de personnes sages, ains de gens desesperes & abandonnez de sens commun, & de la grace diuine. Vos bouches feditieuses repliquent encor qu'en tous cas il faut tousiours la guerre, & que les François & les Espagnols se veulent trop de mal, pour se pouuoir bien accorder: ou que si cela arriuoit par quelque miracle, il faudroit au moins renoncer aux alliances des pays

bas, & d'une bonne partie des Protestants: mais l'acquisition de nouvelles alliances, est-elle la destruction des vieilles, & principalement quand la conservation des anciennes, sert de contrepoids à la défiance que quelques esprits pourroient prendre mal à propos des plus recentes? Iamais certes on ne deuroit recevoir pour amy personne, Tyran iusques là, que de vouloir tirer apres soy l'eschelle, comme on dit, & de ne desirer estre receu en l'amitié d'autrui qu'à condition que pas vn apres luy n'y seroit admis. En outre, ce n'est d'aujourdhuy que nous sommes amys des Espagnols, & que nous auons estreint avec eux d'aussi forts liens, & des nœuds autant estroits d'affection & de bienueillance que ceux qu'aujourdhuy nous rebutēt ces factieux. Nous auons autresfois esté plus grands ennemis des Anglois, de sorte qu'un créancier, la chose du monde la plus odieuse aux mauuais debtteurs, & la rencontre duquel ils euiteroient plustost que celle d'aucune beste farouche, est encōres parmy nous appelé Anglois: Nous sommes pourtant à ceste heure vtilement alliez & confederez avec eux: Car en matiere d'Estat les amitez & les haines ne doiuent ny ne peuuent estre immortelles, ains il les faut chāger quelquesfois selon les occurrēces des affaires, les deportemens differens, & l'vtilité reciproque des Nations: Et si nous y prenons de plus près garde, nous trouuerons encor, qu'ainsi que les animositez des peuples entr'eux dependent d'ordinaire de leurs dernières guerres: quelques François n'ont esté mal affectionnez aux Espagnols, que depuis qu'ayant espousé les interets de la maison de Bourgoigne, ils ont aussi biē succédé à ses inimitiez, qu'à ses prétentions: Mais entre personnes doiées de l'vſage de la raison, il faut

despoillier & se faire quitter tout à fait de ses affections basses & populaires, & comme bourgeois du monde embrasser pour concitoyen tout homme de merite, n'ayant autre mesure de son amour ou de sa haine, entre les particuliers, que la vertu ou le vice: & entre les Republiques, que l'utilité ou le dommage, interests les plus puissans, & les obligations les plus fortes: mais quand mesme ceste rancune indigne de ceux qui se qualifient Chrestiens, seroit encor plus ancienne & inueterée, elle ne seroit non plus excusable qu'un criminel, pour estre de long temps coupable: Les choses antiques ne deuant pour cela estre retenues, si elles ne sont bonnes: autrement il faudroit precieusement conseruer toutes les vieilles taches & ordures, & retourner au glan & au seive, premiere nourriture & delices de nos peres: mais le temps, pere de la verité & de toute cognoissance, amende en fin toutes choses, & nous apprenant ou l'iniustice ou le dommage de nos passions déreglees, nous les fait sagement changer à nostre aduantage & hōneur. Capituians donc nos volonteiz & soubmettans nos iugemens sous le bon plaisir & la prudence de sa Maiesté ne reuestons point d'autre passion que la sienne: car estant l'ame de l'Estat, il faut necessairement qu'il en ayt soing, ainsi que l'esprit ne peut qu'il n'affectiōne son corps: & estant plus sage que nous, il est raisonnable que nostre iugement particulier ploye sous celuy de son conseil: par le prudent aduis duquel, & principalement par celuy de la Reyne, chef de tous les Conseils, & sa mere (qui pour son affection maternelle, & pour sa propre grandeur a interest plus grand que personne à la conseruation du sceptre du Roy son fils, ne pouuāt esperer ny souhaitter ailleurs

plus releuee dignité, que celle que parmy nous elle possède pour nostre bon-heur, & dont nous ne remercierôs iamais assez dignement le Ciel) par le contentement des Princes de son sang, Princes & Officiers de la Couronne, & par les instantes prieres & supplications tres-ardentes de tout son Royaume assemblé en corps d'Estats Generaux: sa Maiesté a resolu & iugé expedient de prendre la meilleure, la plus grande, & la plus illustre alliance du monde, pour le bien de la France, & mesme de toute la Chrestienté. Arrestons nous en là, iugeons pareillement que c'est nostre bien: & si nous ne sommes capables d'en cōprendre la raison, n'en murmurons point pour cela: car les subiects aussi bien contre les offences de leur souuerain, non plus que contre les iniures du Ciel, n'ont point d'autres armées que celles de la patience. Nous appellons les Roys, images de Dieu, & où seroit l'image sans ressemblance? C'est donc approuuer leurs conseils, encorés que nous n'en apperceuions, ny les motifs, ny le prompt succès: en la conduite des grands Estats, ainsi qu'en celle du monde, y ayant souuent des effects lents, mais pourtant certains & vtils, dont les causes nous sont cachees & incognuës, & que nous les deuons croire & tenir quelques deitez terrestres & visibles, prudentes pour sçauoir, bonnes pour vouloir, & puissantes pour executer ce qui nous est necessaire. En tout cas ceux qui resistent à leur Prince seront tousiours haïs de Dieu & des hommes: & les conseils boüillans & temeraires, sont de vray rians de prime face: mais l'execution en est triste, & l'euenement fascheux: De sorte qu'il faut sagement preferer l'obeïssance avec secreté, à la reuolte avec dommage, & les choses cer-

taines & de long temps acquises, aux choses nouvelles & douteuses: Quant aux bons & sages François, & vrais Chrestiens, ils beniront eternellement la memoire de ceste grande Reyne, le plus grand present qu'apres Henry le Grand, le Ciel ait en nos iours faict à la France, qui apres auoir arresté le cours de nos mal-heurs, & releué nos esperances abbatuës, par son heureuse fecondité, a mesme estendu son soing iusques à vne seconde lignée, pour l'assurance & la continuation du repos qu'elle nous a acquis par son soing, sa generosité, & le bon-heur de sa conduite; chose que l'on ne scauroit ignorer sans aueruglement, ny taire sans ingratitude; & nous les bons seruiteurs du Roy, & vray François, nous la remercions tous les iours de nostre vie, de nous auoir procuré la felicité de ces alliances; à l'aduancement de la foy & terreur du Croissant: combien que les meschâs en grondent & en creuent de despit: les deliberations publiques ne pouuant plaire à tous, mais estant diuersement receües selon la difference des passions, & des interets de ceux à qui elles touchent; tout ainsi que les causes naturelles agissent differemment, selon la diuersité des subjects, car le Soleil amollit la cire, & durcit la fange: & la rosee du Ciel nourrit les plantes, mais elle engendre aussi les crapaux. Mais ce qui nous doit le plus consoler, c'est qu'il n'appartient qu'aux hereticques, & aux infideles de hayr & de blasmer ce qui procure l'affermissement de la Religion, & la gloire du nom Chrestien: ny d'empescher que le Roy se marie qu'à ceux à qui sa vie desplaist, & dont le mariage retarde les esperances maudites. Possible que vous repartez que ce n'est rien que l'alliance d'Espagne qui vous faict enrager, que vous

souhaittez que le Roy s'allie, & promptement, en quelque autre maison : mais vous trouueriez encor apres, mille fausses apparences de raison, pour en differer, ou rendre du tout impossible l'execution: Tant il est vray que ce n'est point aux maisons, ny aux Nations que vous en voulez, ains seulement à l'affermissement de nostre repos, qui depend du mariage de sa Maiesté; & à son heureuse lignee, qui vous osteroit l'occasion & l'esperoir de pescher iamais en eau trouble, & de regner dans le desordre : Quant à moy ie ne suis point né Espagnol, mais ie ne dois pour cela deuenir Anglois, & comme bon François ie souhaite la grandeur de mon Roy, & le bien de ma patrie: On voit qu'il est expedient pour la paix de la France que nous ayons au plustost vn Dauphin qui calme nos tempestes: Avec quelle impatience, ô bon Dieu, auons nous attendu cest aage, qui touche desia au but de nostre desir ! Et qui d'entre nous n'eust volōtiers retranché des annees qu'il auroit à viure, pour les adiouster à celles de sa Majesté, & haster ce bon-heur, apres lequel tout bon François doit languir. Or pour y paruenir, pas vn n'ignore qu'il ne faille vne fille de Roy, & de Roy Chrestien, au Roy tres-Chrestien, & fils aîné de l'Eglise: Et que nous n'en pouuons chercher de plus grand que le Roy Catholique, ie ne diray point parmy les Chrestiens, mais en toute la terre, luy qui ne recognoist point d'autres bornes de son Empire, que celles du Soleil, ny trouuer vne race de testes couronnees plus ancienne ailleurs, ny plus illustre pour vn Roy, qui se pourroit iustement vanter d'estre de la premiere & meilleure du monde, si ne luisant, comme il fait, de ses propres vertus, il auoit besioin de l'Estat & de la gloire de ses ances-

fres. Quelle imprudence donc, ou plustost quelle impudence & effronterie à quelques subiects mal-conseillez de n'approuuer, ains de contredire, le glorieux desseing de leur Prince, & principalement en l'eslection & au choix le plus libre de toutes les resolutions humaines, & où le plus chetif d'entre-eux en sa petite famille ne souffriroit en façon quelconque d'estre contredit? & ce pour luy faire violer, & à tout son Estat la foy donnee, & le forcer à rompre & briser le plus sainct & plus sacré lien qu'estraigne en terre la vertu secrette du Ciel? Et il ne faut point qu'ils flattent ou pallient leurs murmures contre la sage volonté de leur Souuerain, par quelque apparence de conseil pacifique, disant que ce seroit allarmer ceux de la Religion prétenduë reformee, & possible en leur faisant prendre les armes, nous remettre dans la confusion, le trouble, le meurtre, le sang, & le carnage plus que iamais; mais l'experience du passé, & les malheurs de nos dernieres guerres ciuiles, dont la playe est toute recente & saigne encores, ne nous ont que trop suffisamment enseigné que Dieu est le seul Roy des esprits, & que la Religion ne se plante point dans les cœurs par les armes; elle veut estre persuadée, & non pas comandée; Et la vraye doctrine ne se pouuât bien prescher que dās la paix, raison pour laquelle N. S. l'a fit par tout le mōde à sa naissance: nō plus que la guerre n'a faict ces iours cy qu'aduancer le regne, ou plustost le desordre de l'Herésie; De sorte que c'est vne maxime arrestée parmy les conducteurs de cest Estat (& que personne n'apprehēde, ou plustost n'en face le semblant à mauuais desseing) d'auoir désormais recours aux Docteurs, non aux espées; au S. Esprit, non à la force: à vne bonne & charitable con-
uersation

uersation, & non à vne mutuelle destruction : leurs
 Majestez d'ailleurs par vn excez de charité & de zele,
 inuitant doucement les deuoyez à leur propre bien,
 mesme par gratification & recompenses, & joignant
 deux choses es autres regnes fort dissemblables, le sa-
 lut des ames, & l'aduencement en la Cour, l'honneur
 du monde, & la bonne conscience. Et puis ceste il-
 lustre alliance inspirée de Dieu, & procurée des hom-
 mes les plus sages, pour le bien de la Chrestienté, & la
 ruyne des mescreans, n'est en nulle sorte pour causer
 vn mal dans nos propres entrailles, ny pour verser en
 aucune façon le sang des Chrestiens, de quelque Re-
 ligion qu'ils puissent estre : mais vous autres esprits
 inquietes, sans repos pour vous, & qui troublez ce-
 luy des autres, Conseillers sans gaiges, & qui vous
 ingerez en tous affaires, sans y estre appelez : Vous
 vous imaginez des troubles en l'Estat, de la part dont
 procedera sa tranquillité, ou pource que vous en estes
 tous remplis vous mesmes, ainsi qu'à ceux qui ont la
 iaunisse, ou le tournoyement de teste, toutes choses
 semblent iaunes, ou tourner ; ou pource que vous le
 souhaitez ainsi par vostre meschanceré, & pour bastir
 vos fortunes particulieres des ruynes du public : Esta-
 blissez premierement la paix en vos ames, & nous
 croirons apres que vous la cherissez dans le Royaume.
 Et ressemblans à ces malheureux Troyens, qui com-
 batirent si long temps, & souffrirent tant de maux
 pour Helene, qui n'estoit pourtant, comme ils pen-
 soyent, dans leurs murailles, ains sauuée en Egypte :
 Ne vous trauaillez plus tant pour la concorde des au-
 tres, ne la logeant chez vous, ains estans tout pleins
 vous mesme de discorde & de tumulte, qui vous fait
 menasser autrui du mal qui vous tourmente : faute de

considerer que les sages & prudents Ministres de cest Empire, personnes vieillies dans les affaires, & portées à tous conseils pacifiques, & particulièrement ce grand chef de la Iustice, & du Conseil du Roy, sous la Reyne sa mere, rare ornement de nostre siecle, & l'exemple singulier de tout ce que la nature, l'art, & l'experience peuuent conferer d'excellent à la perfection des grands hommes, se garderont bien de degenerer d'eux mesmes, & de leur conduite passée, pour rien innouer à l'aduenir, ny alterer le repos de ceste grande Monarchie: Et comme vn bon pere ne hayt pas son enfant, pour le voir malade, ains l'en plainct seulement, & son amour plustost s'en redouble par la compassion: Sa Maiesté pareillement croyant leurs bons aduis & conseils salutaires, cherira & recognoistra pour ses subiects naturels & legitimes, tous les François de la Religion pretendüe reformee, viuans sous son obeyssance, ayant seulement pitié & commiseration de leurs esprits, mais en laissant le soing & la guerison à Dieu seul, & aux conferences douces & amiables. Que si comme les choses humaines reçoient & souffrent differentes interpretations, quelques vns d'entr'eux, conceuoient de ceste alliance quelque ombrage mal à propos, sa Majesté ne laissera pourtant de procurer leur bien, encores que contre leur souhait, & d'affermir leur repos particulier dans la tranquillité publique, qui resulte de son dessein, ores que contre leur opinion, assuree que l'euénement fera clairement paroistre, avec la grace de Dieu, la sincerité de son intention, & la prudence de son conseil: celuy qui ayme veritablement ayant plus d'esgard à l'vtilité, qu'au desir de ceux qu'il ayme: Et ne tenant comme point de

conte de leur consentement, ou de leur gré: pourueu qu'il procure leur profit & aduantage: Et courageux & sage est le Prince, qui mesprisant les vaines apprehensions & importunes crieries de quelques vns de ses subiects, leur faict achepter leur felicité propre, aux despens de quelque petit mescontentement present, mais qui s'en acquiert tost apres d'eux mesmes mille graces & mille remerciemens, & enuers la posterité vne loüange & vne gloire immortelle: Vn bon Roy ne deuant iamais par le desir d'un honneur, ny par la crainte d'un blasme imaginaire, faire rien au dommage, ou manquer à l'vtilité de son peuple; ains se gouverner en toutes choses selon la raison, nō selon l'opinion: les murmures & contradictions des vns ne le destournant de bien faire, ny les prieres & semōces des autres ne l'y conuiant d'auantage, non plus que le Soleil ne retarde ou n'aduance son leuer & sa lumiere, pour la crainte qu'en ont les meschās, ou les souhaits des bons: mais nous autres mieux conseillez où trouuerons-nous iamais assez de loüanges, & comment pourrons-nous rendre assez d'actions de graces à sa Maieité du bon-heur & de la prosperité qu'elle procure tout ensemble à la Religio & à l'Estat? En quoy, ô vrays Chrestiens & amateurs du repos de nostre Patrie, nous auons à grandement admirer la bonté & la sagesse diuine, qui ainsi qu'en toutes autres choses elle a tousiours ioinct & vny nostre vtilité & nostre salut, à son honneur propre, & à sa gloire; semblablement icy elle a tres-biē meslé & confondu les cōsiderations de la terre avec celles du Ciel, & l'aduantage du temporel accompagne heureusement celuy du spirituel. Et vous, ô fideles & prudents Conseillers d'un si grād Monarque, n'avez vous pas esté plustost illuminez

d'une inspiration diuine, que guidez d'une prudence humaine, à ceste haute & glorieuse entreprise! Vous particulièrement le plus vieil & le premier homme d'Estat du monde, grand ministre de quatre Roys, autant admirable en mesprisant les hōneurs qu'en les meritant, & qui constitué en charges & fonctions publiques, où il falloit necessairement obeyr & s'accommoder aux occasions, & ceder à la diuersité des interests & des humeurs de chacun, & estre en vn mot esclau du temps & des affaires, n'avez pourtant rien eu iamais en vostre ame de seruite, ny qui flechist en façon quelconque sous les passions; n'avez-vous pas icy manifestemēt tesmoigné le soing que vous avez tousiours eu de la paix du mōde, tout au moins de la Chrestienté, & particulièrement de la France, qui après Dieu, ses Roys, & ceste grande Reyne, vous doit tout son bon-heur, & sa gloire. Les vrayz Chrestiens, & les sages François, dès à present vous en donnēt mille loüanges, & vn iour la posterité, qui en iugera sans animosité & sans enuie, vous en rendra mille graces; mais qu'elle recognoistra tousiours inferieure à vostre merite, & à vn si grand bien-faiēt. Continuez donc couragement d'assister & de fortifier leurs Maïestez de vos bons, sages, & fideles conseils, & principalement ne vous lassez iamais de haster & d'accelerer ceste vnion des deux plus grandes puïssances de la Chrestienté, qui ne se peut différer, ny retarder le moins du monde, sans nostre honte & dommage; & dont la seule esperance nous a desia donné cinq annees de paix, & la vient fraïschement de faire en Italie. Mais n'entends-ie pas encores ces faiseurs de libelles ramasser tous les deffauts ou veritables ou imaginaires de cest Estat, pour descourir aux yeux de

tous les Estrangers les playes secrettes qu'ils pensent estre en leur Patrie, & reuêler la turpitude & la vergoigne de leur Mere; si tant est, pourtant, que la Frâce aduoie iamais des enfans si effrôtez, ingrats, & desnaturez, ou plustost des sangsuës n'attirant des corps que le mauuais sang, des areignes qui ne tirent des plantes que le venin, & des vautours qui n'ont sentiment que pour les charôgnes : Et se prenant à ce qu'ils ayment le mieûx, ils accusêt entreautres choses la dissipation des finances, que le Roy a esté contraint de prodiguer, afin d'espargner le sang : & ce neantmoins parmi ses subjects, & dans la mer de sa France, dont par succession de temps, il les tire cômme son Soleil, pour apres les respendre, & verser abondamment tout de nouveau : ainsi que le representa si eloquemment dâs le conseil du Roy, & en la presence du Parlement, ce personnage grand en sçauoir, en iugement, en experience, en courage, & en integrité, dont les mains continentes en ont pour le bien de la France l'administration. Aussi ne louëra-on iamais assez les Princes prodigues d'argêt, pour estre trop auares du sang : Et la liberalité qui procede de la clemence, doit estre estimée de tous, encorës que peu y participent : car ainsi que l'art de la medecine n'est recherché que des malades, mais qu'il est neantmoins honoré des personnes saintes; il n'y a pareillemēt que les coupables qui reclament la clemence, mais pourtant les gens de bien la reuerent. Mais quelle meschanceré, & quelle effronterie est-ce là de nous aller reprochant les desordres que vous mesme vous causez ? car si la bonté de la Reyne est empeschée à reparer les bresches qu'elle n'a point faictes, qui en est la cause, que les mauuais humeurs & la rage qui vous agite & vos

semblables : Si vostre licence n'estoit sans pudeur & sans frein, & si la frénésie n'auoit rayagé dans vos cœurs rebelles toute obéissance & tout respect, nous ne verrions pas au tres-grand regret de tous les gens de bien, regner l'impunité des crimes, le Roy ne seroit pas contraint d'achepter à beaux deniers cōptans la fidélité de quelques vns de ses propres subjects. Si nonobstāt il luy plaist d'vser de liberalité enuers plusieurs, pour n'auoir besoing de clemence enuers peu : pourquoy ne l'en remerciez-vous, au lieu de vous en pleindre; & pourquoy ne l'en louiez-vous, au lieu de l'accuser : car remedier aux maux aduenus, est sans doute vne grande loüange : mais c'en est vne bien plus grande d'empescher qu'ils n'arriuent : Et si c'est au Prince vne rare vertu de remettre les fautes commises, ce luy en est vne beaucoup plus excellente de faire en sorte qu'elles ne se commettent : pardonner à quelques coupables, n'estant pas tant les obliger, que de donner ordre qu'ils ne le deuiennent : Et c'est chose de vray tres-heureuse à vn Souuerain de trouuer à son aduenemēt tous ses subjects bien obéissans : mais ce luy en est vne tres-glorieuse, & digne de double loüange de rēdre bons ce qu'il en trouue de mauuais, ou de bons pouruoir qu'ils ne deuiennent meschans : & ce sans effusion de sang; ains seulement par la profusion vtile de quelques millions de liures, pour ramener les vns en leur deuoir, & y asseurer les autres : Non pour cela que ie veuille dire, que si pour nos pechez ce mal continuoit, sa Majesté fust tousiours conseillée d'en vser ainsi, lors qu'elle iugeroit plus à propos de corriger par les peines, ceux que les bien-faicts n'auroient peu amender : & principalement enuers vous, pernicious escriuains, & flambeaux

de sedition : ô qu'il y a long temps que la punition de quelques vns d'entre vous, deüst estre la terreur & le frein de tous les autres ! ô qu'un ancien auoit bonne raison, de dire que l'Estat estoit plus à pleindre où tout estoit permis, que celuy auquel rien n'estoit loisible ! la clemence deuenant inhumaine, quand par l'impunité de certains particuliers, on en rend plusieurs coupables, & y ayant plus de cruauté de pardonner à tous, qu'à personne. Il n'y a pas vn d'ailleurs si ignorant qui ne sçache, ou si malicieux qui n'aduouë que les charges de l'Estat ne soyent de beaucoup accreuës, pour le nombre & la grandeur des penliôs, & des dons necessaires pour le temps, & que le fonds en fust grandement diminué, tant de la remise de quatorze cens mille liures par an sur le sel, que de la suppression tout en vn coup de quarente Edicts qui le grossissoyēt, sans mille diminutions & rabais qu'il a fallu faire, pour la misere presente, des fermes aux partisans, & des impositions au peuple : Si donc en attendant que sa Majesté ait dissipé les nuages presens, & restably cest Empire en sa premiere felicité & splendeur, elle a iugé expedient pour empescher les maux que les meschans s'attendoient de faire, & les bons de souffrir, de tirer quelque argent de la Bastille, puis que l'on ne le pouuoit d'ailleurs sans vexation du peuple, l'accuserez-vous pour degouter les autres de son gouvernement, & leur faire secouïer l'heureux joug de son obeyssance, de ce qu'elle achapte vostre repos, & vous acquiert par la perte du sien, & l'ouuerture de ses thresors, ceste paix qui vous donne le loisir & la hardiesse d'escrire, ou plustost de calomnier ? Vous attaquez aussi la venalité des offices, & le reestablissement, ou plustost la con-

tinuation pour quelques années, puis qu'il ne se pou-
 uoit faire autrement, du droict annuel, comme vn
 grand abus, disant que les riches seront preferez aux
 pauures, mais aussi en seront-ils plus mal-aisez à cor-
 rompre : Et la fragilité maintenant des choses hu-
 maines estant telle, qu'il n'y eust iamais guere
 d'Estats, & particulièrement Monarchiques, où les
 offices ne fussent venaux, vaudroit-il mieux tomber
 és mains des fauoris qu'en celles des partizans ? Et
 le mal y estant desia tout estably, est-il pas raison-
 nable que le Prince, c'est à dire le public, en tire, s'il est
 possible, quelque emolument & aduantage: attendu
 principalement, que l'eslection & le choix, luy en de-
 meure tousiours libre & entier ? Et puis à quoy bon
 de reprendre & d'arguer ce que le Roy desire plus re-
 former que pas vn, si ce n'est que vous accusez ainsi
 toutes choses, non pour amender, ains seulement pour
 decrier son gouuernement ? auquel pourtant, à le cō-
 siderer de pres, rien ne semblera digne de reprehen-
 sion, mesme aux plus sages & aduisez, si ce n'est par-
 aduenture la souffrance & l'impunité de vos escrits
 seditieux & trompettes de rebellion ; car lors que par
 la corruption, qui par laps de temps se glisse ordinai-
 rement parmy les choses les mieux establies, certains
 maux se trouuent tellement autorisez par la vieilles-
 se de leur erreur, que l'on ne les peut desraciner sans
 esbranler la machine vniuerselle, non plus que l'on
 ne peut sans peril de ruine arracher ces figuiers creus
 & enlassez dans les vieilles murailles des temples; c'est
 tousiours beaucoup faire de ne les point accroistre &
 fortifier, mais encores plus d'en tirer quelque vtilité
 d'argent, soustien de la guerre & ornement de la paix,
 puis qu'aussi bien il est force de les tolerer. Tant s'en
 faut.

faut donc que vos plaintes & blasmes soyent iustes, que vous deuriiez plustost loier de prudence de ne vouloir reformer vn desordre particulier par vne dif-
 formation generale, que non pas d'accuser d'iniusti-
 ce la souffrance d'un mal qui s'empireroit, & se ren-
 gregeroit infailliblement par son remede. Vous vous
 pleignez encor de l'inobseruation des loix, & parti-
 culierement de leur nombre, & de la multitude &
 abus des Iurisdiccions, marque certaine de nos mau-
 uaises mœurs; comme la quantité des Medecins de-
 note celle des maladies: Mais est-ce le moyen d'as-
 fermir l'autorité des loix, que de destruire, par vos
 libelles, celle du Souuerain, qui leur donne la vie?
 que de réuerfer le respect du Prince, qui assure leur
 credit? & de nous ietter par vos malheureux artifi-
 ces és diuisions & guerres, qui oppriment & suffo-
 quent leur vigneur & leur force? leur voix, selon
 Marius, ne pouuant pas mesme estre entenduë par-
 my le bruiet des armes? En fin, tous les desordres &
 les maux que leurs Majestez n'ont point faitz, ains
 seulement trouuez, & apres la reformation desquels
 ils souspirent, & trauaillent sans cesse & sans relasche,
 ces meschans les vont rechercher & ramasser, bien
 marris qu'ils ne sont encores plus grands; & les exag-
 gerent, non pour les corriger, ains pour les augmen-
 ter, en rendant odieux par leurs calomnies, le gouuer-
 nement, & la conduite des affaires: & nous precipi-
 tans, à leur possible, dans les malheurs des seditions
 populaires, pires qu'un gouuernement tyrannique.
 Vous enragez, bouches mesdisantes, de la descou-
 uerture de vos damnables desseins & maudites en-
 treprises; parce que les descouurir seulement, & les
 monstrier au doigt, c'est les vaincre, & les empes-

cher : & vous crieriez encores volontiers contre la liberté de les reprendre , comme s'il n'estoit permis que d'accuser , & non de deffendre , que de dire des mensonges , & nō iamais la verité : mais l'ardeur mesme de vostre passion desreglée , & le meschant artifice de vos discours factieux , nous aduertit & nous semōd de nostre propre deuoir , n'estant pas raisonnable qu'à nostre veu & à nostre sceu , vous ayez plus de passion & de soin à destruire l'Estat, que nous à l'asseurer ; à combattre pour la meschanceté , que nous à deffendre l'innocence , ny plus d'animosité à autoriser la rebellion, que nous de courage à soustenir l'autorité legitime. Et comment, la France iadis loüée pour n'auoir point de Monstres , pourroit-elle voir ceux-cy sans les estouffer à leur naissance ? Ains plustost le glauiue de ces langues perçantes, ne fera-il iamais reprimé par le glauiue de la Iustice ? Faudroit-il donc que parmy les loix, vn tel mespris des loix demeurast impuny ? & qu'il fust dict que nous tinssions pour innocents , ceux qui s'efforcent nuiēt & iour de nous rendre tous coupables ? Ayants l'heur & l'honneur de viure sous la Royauté, la meilleure, la plus naturelle, & la plus ancienne forme de gouuernemēt, endurons-nous ceux qui en sappent les fondemens , & en veulent au Roy ? Atys fils de Cræsus muet auparauāt, parla fort bien , quand il fust question de secourir le Roy son pere , la nature faisant plustost des miracles, que de manquer iamais à ce qu'elle doit : Et nous qui sommes doüez de voix , pourrions-nous bien deuenir muets , quand on attaque celuy qui comprend en sa dignité tous les autres deuoirs, le Pere commun de la Patrie, qui assure tout ensemble nos peres & nos enfans, & lequel ne point deffendre c'est l'offencer &

soy-mesme? C'est vous, SIRE, à qui on se prend :
 C'est vostre Majesté qui est assaillie par ces meschans,
 que ie quitte desormais , pour luy adresser mon pro-
 pos avec sa permission, la suppliant tres-humblemēt
 d'imiter Dieu, dont elle est l'image, qui nonobstant
 les murmures & les ingrattitudes des hommes, ne lais-
 se de faire pleuvoir pour les iniustes, & luire son So-
 leil sur les meschans , & leur départ mille graces, des-
 quelles mesme auant que de les leur eslargir, il sçait
 qu'ils se preuandront pour le mieux outrager; & de
 ne se point lasser, assistée des bons & sages Conseils de
 la Reyne sa mere, de condnre heureusement cest
 Estat malgré nos mescognoissances; & de procurer
 nostre bien, sinon pour l'amour des déportements de
 quelques vns d'entre nous, au moins à cause de sa
 bonté, faisant à la verité découler ses faueurs & ses
 bien-faicts plus abondamment sur ceux qui s'en ren-
 dront dignes, mais ne les déniaut pas tout à faict aux
 indignes, & comme vn pere enuers ses enfans, cares-
 sant seulement les bons, mais ayant soin neantmoins
 de tous.

F I N.



